

PEMBERITAHUAN PERTANYAAN DEWAN RAKYAT

PERTANYAAN : BUKAN LISAN

DARIPADA : TUAN SU KEONG SIONG (KAMPAR)

SOALAN : NO. 438

TUAN SU KEONG SIONG minta **PERDANA MENTERI** menyatakan secara terperinci kaedah-kaedah dan kriteria-kriteria untuk layak berdaftar dengan Sistem eKasih. Nyatakan jumlah warga yang telah didaftar mengikut susunan negeri masing-masing dan bantuan-bantuan yang disalurkan di bawah Sistem eKasih.

JAWAPAN: YB DATUK WIRA DR. MD FARID BIN MD RAFIK
TIMBALAN MENTERI DI JABATAN PERDANA MENTERI

Tuan Yang di-Pertua,

Kerajaan amat prihatin terhadap golongan miskin dan sentiasa berusaha untuk membasmi kemiskinan serta meningkatkan kesejahteraan hidup rakyat. Terdapat pelbagai program dan bantuan yang telah, sedang dan akan dilaksanakan oleh Kerajaan khususnya bagi memastikan kadar kemiskinan terus dikurangkan.

Kerajaan telah membangunkan Sistem eKasih sebagai satu pangkalan data kemiskinan nasional yang bertujuan untuk mendaftarkan golongan miskin di Malaysia dan mengklasifikasikan kepada kategori Miskin Tegar atau Miskin berdasarkan Pendapatan Garis Kemiskinan (PGK) semasa melalui proses verifikasi di lapangan. Kriteria penetapan kategori kemiskinan adalah bergantung kepada jumlah pendapatan per kapita isi rumah dan berasaskan kepada formula perkiraan yang telah disediakan oleh Kementerian Hal Ehwal Ekonomi dan juga Jabatan Perangkaan Malaysia melalui Penyiasatan Pendapatan Isi Rumah 2016 ataupun *Household Income Survey* 2016. Sebagai contoh, jika pendapatan

SOALAN NO. 438

bulanan per kapita Ketua Isi Rumah (KIR) berada di bawah RM153, KIR tersebut dikategorikan sebagai Miskin Tegar.

Sehingga 15 Mac 2019, seramai 633,287 KIR telah berdaftar dengan eKasih di seluruh Malaysia dan daripada jumlah tersebut seramai 55,307 KIR berada di bawah kategori Miskin Tegar dan 135,032 KIR pula di bawah kategori Miskin manakala seramai 442,948 KIR adalah di bawah kategori Terkeluar. Data dalam Sistem eKasih adalah bersifat dinamik dan sentiasa berubah dari semasa ke semasa.

Statistik status kemiskinan eKasih Mengikut Negeri sehingga 15 Mac 2019 adalah seperti berikut:

| NEGERI | STATUS KEMISKINAN | | | JUMLAH KESELURUHAN |
|---------------------------|-------------------|----------------|----------------|--------------------|
| | MISKIN TEGAR | MISKIN | TERKELUAR | |
| JOHOR | 360 | 3,588 | 20,660 | 24,608 |
| KEDAH | 954 | 4,275 | 29,655 | 34,884 |
| KELANTAN | 7,730 | 30,657 | 59,996 | 98,383 |
| MELAKA | 1 | 662 | 17,738 | 18,401 |
| N.SEMBILAN | 189 | 2,264 | 17,916 | 20,369 |
| PAHANG | 2,041 | 3,806 | 17,309 | 23,156 |
| PERAK | 491 | 4,234 | 46,148 | 50,873 |
| PERLIS | 64 | 2,498 | 12,324 | 14,886 |
| P.PINANG | 1,433 | 5,404 | 22,134 | 28,971 |
| SABAH | 18,988 | 20,413 | 38,721 | 78,122 |
| SARAWAK | 18,367 | 40,678 | 63,682 | 122,727 |
| SELANGOR | 3,229 | 8,476 | 30,012 | 41,717 |
| TERENGGANU | 175 | 4,596 | 50,345 | 55,116 |
| WP KL | 1,038 | 2,864 | 13,144 | 17,046 |
| WP LABUAN | 247 | 605 | 2,906 | 3,758 |
| WP PUTRAJAYA | 0 | 12 | 258 | 270 |
| JUMLAH KESELURUHAN | 55,307 | 135,032 | 442,948 | 633,287 |

Data-data dan maklumat diperoleh secara terperinci oleh pembanci melalui sesi temu ramah secara langsung/bersemuka serta pemerhatian di lokasi isi rumah berkaitan. Butiran maklumat yang diperoleh adalah seperti berikut:

SOALAN NO. 438

- (1) Pengenalan KIR dan Ahli Isi Rumah (AIR)
Maklumat berkaitan butiran peribadi KIR dan AIR seperti bukti kad pengenalan, jantina, agama dan kaum.
- (2) Lokasi
Maklumat berkaitan Negeri, DUN, Parlimen dan Daerah di mana isi rumah menetap.
- (3) Kediaman
Maklumat serta pemerhatian jenis dan keadaan kediaman isi rumah.
- (4) Pendidikan
Maklumat seperti taraf pendidikan tertinggi dan sijil-sijil berkaitan sekiranya ada.
- (5) Kemahiran dan status pekerjaan
Maklumat seperti kemahiran yang dimiliki oleh KIR dan AIR serta pekerjaan yang dilakukan untuk menyara keluarga. Maklumat ini juga merangkumi jarak isi rumah ke tempat kerja dari kediaman dan pengangkutan yang digunakan untuk ke tempat kerja.
- (6) Harta
Maklumat berkaitan jenis harta dan bilangan aset yang dimiliki oleh isi rumah.
- (7) Kesihatan
Maklumat berkaitan penyakit yang dihadapi oleh isi rumah, jenis rawatan dan jenis kecacatan yang dialami.
- (8) Pendapatan
Maklumat berkaitan punca pendapatan isi rumah seperti pendapatan bergaji, pendapatan pekerjaan sendiri (bukan pertanian), pendapatan daripada harta, kiriman isi rumah lain dan pencen.
- (9) Penerimaan bantuan
Maklumat berkaitan bantuan yang pernah diterima oleh isi rumah serta bantuan yang diperlukan oleh isi rumah.

SOALAN NO. 438

Sistem eKasih juga bertujuan merekod maklumat bantuan bagi mengelakkan sebarang pertindihan atau ketirisan penyaluran bantuan/program kepada golongan miskin. Sistem eKasih memberi ruang kepada semua agensi pemberi bantuan yang terlibat dalam program pembasmian kemiskinan di peringkat Persekutuan dan Negeri mengakses data/maklumat kemiskinan yang sama seterusnya membolehkan pihak Kerajaan menyalurkan bantuan yang sewajarnya dengan lebih berkesan dan efisien. Maklumat-maklumat bantuan ini dikunci masuk dan dikemas kini oleh kementerian/agensi pemberi bantuan masing-masing.

Terdapat enam kementerian utama yang terlibat dalam penyaluran bantuan melalui program-program yang dilaksanakan iaitu Kementerian Pendidikan Malaysia, Kementerian Pembangunan Wanita, Keluarga dan Masyarakat, Kementerian Pertanian dan Industri Asas Tani, Kementerian Pembangunan Luar Bandar, Kementerian Perumahan dan Kerajaan Tempatan dan Kementerian Sumber Manusia. Contoh-contoh jenis bantuan yang disalurkan adalah seperti berikut:

| BIL | KATEGORI BANTUAN | JENIS BANTUAN |
|-----|------------------|--|
| 1. | Keperluan Asas | Bantuan Bina Rumah Baharu, Bantuan Baiki Rumah, Rebat Bil Elektrik RM40, Program <i>Food Bank</i> |
| 2. | Ekonomi | Program Peningkatan Pendapatan, Program AZAM, Bantuan Usahawan |
| 3. | Minda Insan | Kursus Jahitan, Program Pembangunan Latihan dan Kerjaya, Program Minda Insan, AZAM Kerja |
| 4. | Sosio Kebajikan | Bantuan Orang Tua, Bantuan Kanak-kanak, Elaun Pekerja Cacat, Bantuan Sara Hidup, Program i-SURI, Pelan Perlindungan Mikrotakaful Jariyah PruBSN |
| 5. | Pelajaran | Kumpulan Wang Amanah Pelajar Miskin (KWAPM), Bantuan Rancangan Makanan Tambahan (RMT), Dermasiswa TNB, Laluan Khas UPU |
| 6. | Lain-lain | Program Peningkatan Ekonomi Setempat (PPES), Program Kampung Sejahtera (PKS), Program Pembangunan Masyarakat Setempat, Inisiatif Peduli Rakyat (IPR) Kerajaan Negeri Selangor, Program i-Sejahtera Negeri Pulau Pinang |

Sekian, terima kasih.